

Kollen in das dorff gehen mit allen czugehorungen vnd gerechtikeytenn, als er inn synen vier reynen gelegen ist vnd den Merten Valtin bißher inne gehabt, besessen, yn nu verkowfft vnd uffgelassenn hatt czu vnser lieben frauwen kirchen in vnser stadt vnd zcu der Elbruckenn zcu Myssen vereygent vnd gefrihet habenn, voreigen vnd frihen denselben wyngarten mit allen vnd iglichen sinen zcu vnd ingehorungen zcu der gnanten kirchen vnd bruckenn von vnser furstlichen macht alßo geinwertiglich in vnd mit crafft dits briues alßo, das der gnante wynberg czu ewigen geeziiten hinfurder bie der kirchenn vnd brucken blieben sall, den auch die verweser der brucken vnd kirchen zcu rechtem eygentthum haben, des gebrowchen vnd gnießen sullen vnd mogenn ane allermeniglichs inntrag vnd hindernyß —. Hirbie sint gewest vnd geuzogen vnser rete vnd lieben getruwen Hugolt von Slinitz vnser obirmarschalg, er Nickel von Schonberg ritter hoffemeyster, Hans von Mergentael vnser cantzler vnd ander vnser manne vnd dinere gnug glowbwirdiger. Czu orkunde — gegeben zcu Mysse am dinstag Johannis baptistae noch Cristi vnsers lieben hern geburt vierczhundert darnach in dem sechs vnd sechtigisten iare.

Nach dem Orig. im Rathsarchiv zu Meissen. Dicht unter den letzten Worten ist das unbeschrieben gebliebene Pergament mit dem Siegel abgeschnitten.

Schramm hist. Schauplatz d. merkw. Brücken. Urk. S. 50.

### No. 125. 1469. 30. Dec.

*Kurfürst Ernst und Herzog Albrecht übertragen dem Nickel Knawt das Thoramt in ihrem Schlosse zu Meissen* — tun kunt, das wir Nickeln Knawt vnserm liben getruwen vmb siner vlissigen vnd annemen dinste willen, so er vnserm hern vnd vater gotseligen vnde vns offtmals getan hat — vnser torampt vff vnserm slosse zcu Missen mit alle dem das zcu dem selben thorampt gehort vnde gehort hat vnde als das sine vorfarn vor ym ynne gehabt haben, mit namen alle quatuor temper zwentzig gute groschen uß dem ampte Missen vnd alle wochen dry groschen vor spiese, achtvndfirtzig brot firtzehn licht vnde souil couent als er vor sich vnde syn gesinde bedarff, alle fritage eyn halb stobichen bir, zcu Ostern dry heiligen tage, zcu Pffingsten dry heiligen tage vnde zcu Wynachten dry heiligen das sint ye des iars nun heiligen tage, iglichen derselben tage ein halb stobichen bir, alle vnser liben frawen tage die namhafftig sint iglichen eyn halb stobichen bir, aller zwelfffoten tag ein halb stobichen bir, alle wigfasten dry tage am mitwoch fritag vnde sonabend ein halb stobichen bir, an aller heiligen tage, an vnsers hern lichnams vnd uffarts tage iglichen eyn halb stobichen bir, eyn malder korn zcu Czeren vff eynem gute dem closter zcu Suzelitz zcustende, da ytzunt einer gnant Thyme vffwanet, zween scheffil korn vß dem ampte, das er die wege zwischen beyden thoren reyne heldet, in der fasten alle wochen firtzehn heringe, durch das gantz iar souil borneholtz als er vor syne behusunge zcu fuerweg bedarff, sine lebetage vß vnserm ampte zcu Missen zcuheben mit gebruchung des tichgarten vndir dem slosse zcu Missen vnde anderm was sine vorfarn gehabt han, gnediglich empfolen vnd vorschriben haben, empfolen vnde vorschriben demselben Nickeln Knawte sulch vnser thorampt, die wile er lebt mit uff vnde zcuslissen vnde was sich ym zcuthune geburt vnd ander fur ym getan haben, getrwelich furzcusteen vnd ußzcuwartten, — vnsers slos Missen bests zcu werben vnd ergestes vnde schaden zcubewaren nach sinem besten vermogen. Vnde gebieten hiruff dir Jost Passeck itzunt vnserm schosser zcu Missen vnde allen dynen nachkommenden schossern doselbst, das ir dem gnanten Nickeln die wile er lebt vnde an vnserm ampte also ist, alle iar vnd uff eine igliche zeit besundern sulch obingemelte stucke nach meldunge vnsers briffes vß vnserm